

巢经巢全集

第五
册

播雅卷第十三

遵義鄭 珍子尹編輯

遵義唐樹義子方校訂

李丹吾鳳鄴 三十二首

鳳鄴字丹吾號半山峯人仲生孫乾隆甲午舉人著有六書啓蒙讀史
論苗爾雅讀杜心解戊巳編覽軒雜著丹吾年五十始舉於鄉屢躋禮
部益淹究經史肆力詩古文辭每一操觚必有關於人心風俗而其醇
樸雅茂之氣尤得之涵泳閩洛爲多嘗曰理學文章判然兩塗古今才
士優文藝而短器識由理學少體會耳又嘗與高弟陳心齋書云凡讀
四子書當以集註爲本此是身心性命上功夫若徒博覽古今名物故
實爲詞章之助此就末流上用心恐終玩物喪志爲有外無內之學可
以知其所深造矣性峭直不肯俯仰隨人生平足未一入官府鄉鄰有

身終集抄
爭得一語輒釋年八十一乃終其詩品雄渾直朴得杜韓之一體每一吟詠愈想其爲人云

歎八股

八股有真派先賢講之詳六籍作根柢百家佐汪洋理勝法因到氣克詞乃昌
前明王唐薛今日熊劉方諸公遺稿在誰非經籍光近看後學祕令我疑徬徨
講義惟體註書理墮渺茫或問及語類詢之皆俚俚所恃枕中寶墨調摩鏗鏘
不經亦不史何漢又何唐抹取他人粉炫爲自己妝私偷任昉錦擗摭義山裳
寄語文苑客此絃當更張

芷江吟

澧有蘭兮沅有芷三閭當日思公子黃昏日暮楚山青不見美人煙霧起

戊巳紀事

前歲乾隆戊子秋淫雨淋淋苦不休去年六月方斷雨連月無雲大日頭始遭

淹漬百穀爛繼復亢旱無少休石烈山焦竹木死枯溪竭井乾龍湫高田斬斬
無顆粒水田得半稱有秋可憫山居種山氓山糧一切盡不登高粱火熾赤如
血大豆火焚黃無藤山間一望白茫茫農人相語淚沾裳半擔割盡半坡土一
日收來一頓糧自從己丑八九月家家打鉏備空蕨有蕨之處亂如麻野阜荒
岡盡翻掘我家遵義在南鄉耳聞不如目見詳孃不愛子投之水子不顧爺逃
四方杖瓢乞者非遠人或爲比鄰或六親攜兒抱女至續續犬亦嬾噪空臥門
荒祠古樹輒團宿黑夜火光紅四鄰君不見去年九月直至春移民壓路烏江
濱臘月苦寒正月雪泥塗辛苦難具論賣兒賣女祇求主斗米議價不道銀或
擲幼女向溪谷或棄孤兒前獨行哭泣之聲徧道路路旁十里百死人絕憐乳
婦身已僵幼子呱呱泣在旁不知其母早成鬼尙作生看抱乳嘗又不見四山
踰地撐茅篷遠來掘蕨於此宮雪深尺許蕨難掘蕨泥充飢哽胡龍食盡蕨泥
雪不止死人枕藉山洞裏面如黛色身如柴不棺不衣真可哀茅草野棉作葬

具三三五五一坑埋吁嗟呼噫嘻荒災民况難爲辭他年人說戊巳事但視覺
軒歌此詩

庚寅紀事

乾隆己丑稼不登處處田園播小春播得小春將到口平疇一望喜青青庚寅
太歲忒狼惡三月十九雨雷雹大如雞卵小如丸竹枝無葉木皮脫四月麥根
脚底黃麥田行過灰染裳割盡一坡無一擔牛挑收盡半山糧前五月迄後五
月一兩三錢米價急寂寂鄉村少爨煙夜月蕭條聞哭泣樹皮草穗不嫌酸野
菜山蒿不用鹽市中只有米糧貴馬牛雞彘不當錢父母兄弟妻兒女南北
東西各覓臂六親骨肉不相顧幼倒陌頭老溝死此災此烈豈徒然明者已見
於幾先己丑六月彗星見其長數丈色如煙凡屬災祥各有自吁民何辜難問
天紙短詞粗記不盡酒闌月落淚如泉

閒行紀事

夏午炎炎綠樹涼間行數里四山荒兩溪小水合流處牧童遙指是雞場穿出
青林攀石谷白髮老翁牽幼犢我向老翁致殷勤老翁脫笠看余哭言是高籠
老農民子孫男女十五人穉填溝壑壯者散祇今惟有老夫存君不見前去里
許號前邨百家煙火闌黃昏今時滿眼青青草野狐升屋烏巢門又不見四野
所在堆髑髏或倚樹下或傍溝城中死者更若麻官差督葬用牛車城外壕深
一丈許異姓骨肉會一家老翁言罷淚潸然覺軒聞之心徹酸歸來酌酒記燈
下擬似噉噉鴻雁篇

同家婦

并引

婦開州青堰人其家十餘口乾隆庚寅飢死者半其夫與姑泊諸叔皆逃不
相顧而婦獨存有二子而幼所居前後里許無人煙婦日負鋤自耕夕則鬼
聲隣火可畏婦若不知也或憐之勸移居他村婦曰夫與姑若存必歸若死
吾亦生於此死於此而已傍人門戶吾不爲也過其門爲詩悼之

荒年恩誼不相屬死者如麻生者促夫妻相棄兒母分或走昭通或奔蜀全家
骨肉散如雲少婦紅顏守空屋山高水曲絕人煙冷舍悽廚傍深谷夜來磷火
碧四山餓鬼門前相對哭日間鉏罷山中草黃昏吹火煮稗粥丈夫別後未知
存每念老姑淚盈掬蓬頭亂髮待生還無親可倚亦無族我過門前氣慘淡牆
邊無路草自綠二子吁嗟傍門坐其母前山正薊菽畏生畏死知幾何自拚一
命無懼縮乃歎飢寒天性薄男子不如女子樸

官田壩宅後有香坪老虎洞望哨坡萬人墳水落坑諸處耕人常得鐵礮
傳是吳三桂僞將馬寶曾將兵過此考康熙二十年提督周卜世克復遵
義馬寶棄城犯瀘敘大約在此時也歌以紀之

水落坑邊百草黃耕人常拾舊刀槍圓圓鐵礮大如卵不識何年古戰場林暗
天陰雲濕濕萬人墳上鬼號泣夕陽磷火散山顛客過香坪皆股票百年事過
盡沙蟲猶憶管人苦播中草竊狗偷知底姓父老憎傳馬國公

茶山關

茶山臨古渡險絕據前川石壁千尋立蠻江一綫穿人從樹杪下石向嶺頭懸
過客頻來往同嗟馬不前

弔陳東升旭

高尚陶彭澤襟期出世塵爲官稱任久解組得家貧室內常彈鋏廚閒但有薪

重陽霜菊早花下一沾巾

東升始任四川忠州學正繼改貴州黔西
州學正升經歷辭不赴告歸年八十餘卒

登貓山絕頂回至山家飲茶

徑仄藤蘿合林荒石磴斜黃梁依夕照紅子漫晴霞茅屋幾椽雅疎籬一犬譁
山家欣客至老嫗煑新茶

丹吾戊己編云紅子木類山谷道旁多有之高二三尺叢生拳密根最

堅深枝閒刺如錐二三月開細白花結子圓扁攢簇大如豆者味極甘

細稍苦澀子紅如火亦有黃色者八九月熟若至冬經霜雪其味尤佳

嘗有句云黃茅傲雪稜偏利紅子經霜味更甜珍按此果四川志名救
軍糧云昔有軍糧不足以此充食故名今貧家及其熟時爭摘之磨作
蒸餅歉歲民尤賴之以惟產黔蜀地故自來譜救荒者俱不之及

悼亡妹

依稀如昨日已是兩年中宿草侵山綠春花照墓紅烏啼庭樹冷月落夢魂空
悽絕大雷岸有書何處通

殘菊

百草萎霜後黃花亦不芳枝欹曾裊露幹老尙擎霜病葉留寒翠餘香散夕陽
籬邊多恨客對爾一沾裳

重陽憶舊

書齋餘寂寞佳節憶前遊亦欲登高去何堪望遠愁寒花依石砌破帽戀人頭
知己如雲散詩成孰更酬

弔黃生世英

汝數何爲促斯時豈死時孤兒方幼稚衆女尙嬌癡撒手一朝去蓋棺諸事寢
我來親奠爾淚落有餘悲

秋望

秋風移物象閒眺倚前岡岸遠蘆花白山高豆葉黃楓林微瀾瀾竹嶼轉蒼蒼
沙雁隨雲起遙天字一行

雷水堰

是堰名雷水楊家舊別莊堤連山左右阜鎮水中央浪激松杉古風搖菡萏香
當年歌舞地憑弔幾徬徨

按雷水堰在郡南七十里前明楊氏築周四里許中有九井灌田近千
頃水心小山舊有亭觀今圯惟古柏存盛夏紅荷環山甚可玩旁有雷
音寺寺中有明謝一夔成化十九年跋宣慰使楊輝輓詩一碑堰上卽

集經身指
輝墓與其妻田氏俞氏合葬田右俞左

伊尹耕莘處

昔日耕莘地居人指趙莊託孤肇周漢伐暴變虞唐遺址叢芳草荒臺照夕陽
柳陰憑繫馬何處覓空桑

杜鵑

九十春過簇茂林誰教枝上弄哀音聲聲歸去行人遠夜夜聽來客感深已化
何知悲望帝長啼自合號冤禽絕憐拜爾雲安老離亂遷流淚不禁

懷周容宇

寬

殘燈無焰豆棚涼此夕思君淚滿裳三月春花同酌酒廿年風雨每連牀元龍
意氣凌山岳海鶴丰儀倚昊蒼才略文章無寸效泉臺人世兩茫茫

太陽坪

林霧迷漫晝不明問來云是太陽坪零星草屋依崖立淺激溪流脫足行爨婦

牧牛兼采菜，螻童騎馬學吹笙。向來古箐今開闢，斗磧荒原尙未耕。

經舊遊

西風庭院日遲遲，往事蒼涼到處悲。黃菊花開人去後，白塘秋淨月明時。故園已改先年徑，古樹全芟舊日枝。惟有門前遮路草，荒寒空映欲傾籬。

答友人

頻年契闊意何如，病裏無心覓雁魚。只爲殷勤謀藥物，因之悠忽闕音書。堪嗟故恙無時了，豈是交情此日疎。半載兩承君顧問，思君亦劇暮春初。

白泥道中

征塵僕僕向天涯，北望春明歎路賒。平月江山堪入畫，白泥風雨似飛沙。蕭條野店催疲馬，寂寞寒林起暮鴉。道上相逢總歸客，可憐歲晚更辭家。

春日展劉雲穎華曜墓

孤冢臨山土尙新，投詩欲弔不成文。三春月下可憐我，五夜夢中頻見君。花徑

停雲成往事墓門宿草帶斜曛英靈不逐東風散華表鶴來聲應聞

按雪穎乾隆己卯舉人與李涵侯李萃皆羅大田弟子又皆其婿是科
遵義中者止其僚婿三人鄉里艷之而雪穎時甫弱冠榜後燕於友所
大醉獨宿樓上晨視之已死矣

菊花

燦燦東籬下幽姿不染塵世無陶靖節知己屬何人

赤水河放舟

晨雞催著客衣單江霧冥濛撲帽寒舟子開頭天未白一聲款乃下銀灘

銀灘
在第二里

台郵下
二里

黃葛沱

黃葛沱頭亂石撐千尋削壁勢崢嶸生憎猿狖心情別負子攀藤自在行

二郎灘

春波紅溜日初晴下水舟如一葉輕兩岸青山看不定土城百里片時程

按赤水源自雲南鎮雄州西北山流經四川永甯縣入貴州畢節縣界乃名赤水東入仁懷縣界至縣西二十里茅苔邨是爲蜀鹽登陸處又百二十里爲青龍灘又二十里爲二郎灘鹽艘至此不能上陸運越山以達於青龍又西八十里經仁懷廳之土城城山明水秀地坦人稠明季以仁懷縣治距郡太遠議移城於此卒不果行又五十里爲猿猴灘鹽至灘下起陸舊時舟行者僅挽及此乾隆十年經張中丞廣泗開修鹽艘乃達茅苔矣又五十里過初設仁懷縣城又三十里經仁懷廳治又百二十里至三江觜與鰲水合又三里入於大江今驗赤水卽前漢地理志犍爲郡南廣下所云有大涉水北至符入江過郡三行八百四十里者也水經江水篇云又東過符縣北邪東南鰲部水從符關東北注之注云符縣治安樂水會水源南通寧州平夷郡暨縣北經安樂縣

之東又經符縣北入江其鰓部之水未聞按桑欽所稱鰓部水安樂水同是今源自仁懷縣北四百里之九倒拐下流爲高洞河至三江背合赤水入江者此水自高洞以下水土人皆名鰓水水產鰓魚爲他水所無故於古地名鰓部其水卽名鰓部水大涉水鰓部水合流數里卽入江其上流皆是巨犇無可軒輊水經以高洞河爲主故在符注江者止稱鰓部水不及大涉水漢志則以赤水爲主故止言大涉水至符入江又不及鰓部後世言水道者無一知有高洞河致欽固水道不明故因此詩詳之又符黑水與大涉水在漢志判然二流入江則一在焚道一在符尤爲別白自酈氏注江水篇始牽混大涉水入符黑水後人皆不覺其誤是亦所宜知者

桃源洞

桃花夾岸水粼粼鼓枻重來不見津當日淵明原寓意洞中那得有秦人

悼程氏妹二首

夏日更無三頓粥冬來惟有一層棉好將寒骨歸冥府訴與閻羅應見憐

全受全歸七尺身傷心此去有微痕陰王若問左肱血說是生前曾救親

母病妹割

左股救之獲起

杖贊

賢哉此杖附身僅僕不顧養者對爾羞辱

唐連州鐔一首

鐔字燮堂介石先生子羲季孫乾隆甲午舉人累官廣東連州知州燮堂所至愛民如子折獄若神奸宄斂跡人稱能吏父惟被字紫章乾隆辛酉拔貢剛介自持言行不苟官施秉縣教諭平生手錄書數十帙不作一行草字其主敬可慕也

送猶子源善至粵署歸

不生機械不趨時數月相依遂別離執手丁寧不忍釋兩家共保一家兒

王舉人儲德 三首

儲德字藏齋綏陽人乾隆丁酉舉人

微雨

微雨無聲至推窗看始知薄雲行復聚新蕊重還欹

秋閨

聽斷南來雁天涯信渺茫帳含千里月素織五更霜寂對紅蘭老愁看綠簾涼
最憐宵漸永夢不到沙場

莫愁湖

誰令斯湖號莫愁愁心豈易付東流若真洗得愁千斛願與愁人日夕遊

唐選貢鋤 五十二首

鋤字怡堂鐔弟乾隆丁酉拔貢著有寒碧亭稿怡堂家郡郭北芙蓉江